

四庫全書

子部

欽定四庫全書

居易錄卷二十八

刑部尚書王士禎撰

門人翰林侍講學士史胄司

夔言直

大內曾睹淳化閣帖初搨有畢文簡公士安手跋

十一月初一日日食集禮部行救護禮是日天陰微雪
不見

門人國子監助教趙

善慶

德州人前戶侍景毅

繼鼎

之孫也

家藏一玉爐云耕夫得之古冢中冢有斷碑云君諱植

字子建始疑是陳思王考之乃北齊高植墓按高氏渤海蓀人正今德州境然北齊書竟不載植姓名何也

不倣倅俚諺也北齊書後主穆后名舍利母名輕霄後

入宮幸於後主女侍中陸大姬養以為女

即令

后以陸

為母提婆為家更不倅輕霄蓋南北朝已有此語

門人戶部主事陳子文

庚禧

工書所藏陳白沙草書一卷

皆七言絕句用秃筆書甚類放有白沙像頗豐偉似四五十許歲人湛文簡公題二句云坐忘碧玉今何世獨

對青山不著書門人湛若水

晉書載記慕容德立鐵冶於商山立鹽官於烏常澤按
商山即今新城縣東南鐵山是也烏常澤不詳何地太
平寰宇記引續述征記曰烏常泛齊人謂湖為泛中有
臺生結蒲秦始皇結蒲繫馬於此今蒲生皆結齊乘謂
堯水由黑冢泊入海注黑冢即烏常泛也按蒲臺縣一
名秦臺命名以此則烏常當在蒲臺宋九域志亦載濱
州下正今蒲臺地

郡國志臨淄縣東有陰陽里即諸葛武侯梁甫吟云步出齊城門遙望陰陽里云云今樂府作蕩陰非是

太平寰宇記云商山有鐵鑛亦出磁石

上諭諭戶部順天保定河間永平四府地方今年水潦傷稼三農歉收朕巡幸所至徧加諮訪聞高阜之產尚有秋成而卑下之田被潦者多計所收穫不能相敵雖經勘災頒賑不致仳離失所而額辦錢糧若仍行徵取民力匱乏難以輸將朕心深為不忍着將四府

康熙三十五年地丁銀米全與蠲免用示寬恤其霸州
雄縣香河寶坻四處皆有水道可以轉輸着各發米一
萬石各差司官一員齎往減值發糶以濟民食以副朕
軫念災黎至意尋以直隸巡撫沈朝聘題報宣化府霜
災奉

旨三十五年錢糧照順天等四府通行蠲免

元和郡縣圖志

唐相李吉甫撰

崑山徐庶子果亭

東義

有鈔本九

域志

宋王存撰

徐亦有鈔本第二卷以下尚完其第一卷京

東東路及序多闕軼正吾鄉齊淄青等州也惜無從考證之祝穆方輿勝覽亦闕此幾卷朱太史竹垞彝尊向有此書當寄問之

十賢后妃圖一卷元至大三年庚戌王振鵬畫首列名阿實克布哈臣塔斯布哈臣托克托臣李邦寧臣李孟臣三寶努前有表一通其略曰至大三年皇上朝興慶宮上皇太后尊號曰儀天興聖慈仁昭懿壽元皇太后大赦天下慶溢宮庭歡騰海瀕是日宴阿實克布哈等

於五花殿中臣等捧觴稱賀隨蒙皇太后手示臣等以
臣王振鵬所進聖母賢妃圖十冊臣等恭閱一過還至
御前復蒙命臣等登記名氏於首以彰一時君臣相得
之盛云云

越中若邪谿亦云若耶邪于遮切宋九域志云徐浩遊
若邪谿曰曾子不居勝母之問吾豈遊若邪之谿因改
為五雲谿是讀作邪正之邪類惡谿矣

九域志宋時潞州上黨郡貢人參一千斤墨一百枚充

州絳州皆貢墨一百枚今三地墨皆絕響上黨人參徒存其名耳志載澤州亦貢人參十斤

董澤在河東猗氏聞喜二縣間九域志載於兗州云龍池九州要記云董父好龍舜遣泰龍於陶邱為泰龍氏又云泰龍城在潁昌府許昌郡又云劉累泰龍城在汝州臨汝郡

水經注堯之孫劉累

又云泰龍井即劉累畜龍之所在

滑州靈河郡一事而紛紛如此

琴高事列仙傳云趙人浮游冀州涿郡間後入涿水九

域志宣州宣城郡有琴溪琴高山琴高釣臺又潞州銅
鞮縣有琴仙祠即琴高也地里書傳會不足考據大抵
類此

九域志衢州信安軍有殷浩宅土人號曰殷牆

張華封壯武郡公今青州府諸城東二十里有壯武城
是其地也

芮城陰氏得古鼎於冢墓中高二尺餘腹可容二斗許
脰有變文有銘凡七十一字陳子文

英禧

搨之譯得五十

二字以示同官孔東塘

尚任

譯得六十九字然未敢遽信

不疑也姑錄於此

王大狩蒐于野

陳闕

田既王射有率衆

陳闕

師從

陳作人

小子

卿射王歸自野田王驂乘

二字陳并闕

中

陳作仲

广命衆

陳并闕

奮先馬步王曰命衆奮乃克至于

陳作余

舍其

陳本有孔本闕

舍

汝臣卿

陳闕

家王至于南

陳闕

宮王命拜稽首曰小

陳闕

其

闕字命對揚王休右似是田獵歸而君臣宴享公卿拜

賜之詞古篆與焦山文王鼎相類

杜大司馬肇余

臻

言康熙十四年官內閣學士時恭遇

立儲大典諸相議

赦書條款進呈或言八旗逃人甚多應不赦臨朐馮文

毅公

傳

獨持不可爭之極力天已暮立促入奏遂兩議以進

上面詢其故文毅持已議益堅

上曰卿等暫出另議畫一以聞至閣已二鼓矣諸公譬

說百端文毅斷斷不可竟再具兩議上之

上竟從文毅議

杜大司馬又言東粵初返正所司具正賦雜稅之數以聞

上以問諸閣臣寶坻杜文端公

立德

對曰廣東雜稅多係

尚之信所加為民間大累非

朝廷舊額也

皇上富有四海何需此區區數萬金錢今兩粵變亂甫定正合與民休息臣謂除之便

上從之二相勁直如此宜

恩禮終始不衰云

起丁憂服闋在籍文華殿大學士兼吏部尚書李天馥
赴京入閣辦事

朝房偶徵駝事予因言駝以柳為酒食柳條則醉太宰

熊公青岳

賜履

云醉駝當作何對予曰狂象諸公以為切

予又戲舉湯若士傳奇云駝子駝孫亦有對否少宰彭

公羨門

通孫

應聲曰鸚父鸚母予曰魚爺魚舅亦佳按鰯

魚亦名魚母

一日東闕門會議既畢倦甚與陳大司徒說巖廷敬同出
端門行稍疾回顧諸公皆在後予笑謂陳公曰今日可
謂高才捷足陳曰否不過急流勇退耳明日集朝房述
之皆大笑

京師某梨園部一旦有姿首解文義喜誦韓閣學元少
策制舉文一日啓奏後左門予向韓詢其人本末孝感

熊公

賜履

因言金陵某樂部一旦最喜誦杜于皇潘詩陳

大司徒曰杜詩韓文固自應爾衆亦一笑

宋二中丞牧仲

聲

偶於蘇州閭門桃花鵑野圃中得片

碣題唐六如墓因封樹之立碑焉近有書至云方重建

蘇子美滄浪亭取予送尤太史展成

侗

詩句作亭聯云

戲魚明鏡閣喬木古亭深俾予作亭記其好事如此

遣刑部主事宋駿業往浙江紹興杭州二府重建蘭亭

并重葺孤山放鶴亭仍奉

御書蘭亭楔序鮑照舞鶴賦刻石

以大理寺卿李鈞為兵部督捕右侍郎

督捕侍郎王國昌丁內艱

以太常寺卿喻成龍為大理寺卿前工部尚書熊一瀟
為太常寺卿

十二月十七日頒

赦百官候宣

詔於天安門戶部赦江南等九省山西平陽府積欠錢
糧二百三十餘萬刑部奏釋繫獄前陝西巡撫布哈湖
廣巡撫張沂兵部督捕理事官熊賜瓚

穎上縣王版蘭亭黃庭本出井中藏於縣庫後又摹刻

一本寘

文廟中明末流寇之亂庫石碎於賊今惟摹本尚存學

宮

擢奉天府府丞徐璽為府尹

府尹王國安丁內艱
璽前工部右侍郎

郭紹儀字丹葵平湖人明御史也嘗雪夜讀書地涌汞盈尺許因悟坎離之義又嘗飲酒肆見一人古貌脩然徧身絲縷如牛毛紅類丹砂異之就與語自言是靖難時人遂從受養生之術鼎革後卒年八十四

魯顛子者無名字云是宋肅簡公喬常居平湖盛暑或
衣綿絮雪中則赤體遊行嬉笑自得亦嘗過人家索酒
飲數斗不醉自言當在雲間脫殼遂往松江遇知府方
禹修岳貢出作醉顛狀大呼斥其名且曰當不良死方怒
杖之立斃後二年有人見之吳閭門有醉歌一首云擲
杖下丹邱寒花點石樓十年殘醉裏不見海山秋

唐人小說謂張祐之子為冬瓜蓋以瓠子冬瓜為謔耳
紫桃軒雜綴謂祐曾為秀州冬瓜堰官則是以所官之

地名其子耳

宋洪忠宣公皓奉使大節不殊蘇子卿子文敏公邁又奉使可稱無忝乃太學諸生謗之曰厥父既無謀厥子安能解國憂云云南渡太學之橫如此

趙子固落水蘭亭在孫北海

承澤

侍郎家前人題跋甚衆

鄒忠介公

元標

與慈谿姜松檠太常

應麟

以氣節相許嘗從

奉常曾孫西溟見公與姜公數東聊錄其一云翁丈與吾輩俱老年雖稟得厚未可輕恃日間只用一味如臨

深淵如履薄冰養德養身並切要諸世間事何足齒牙
天奉林泉佚我老政是大賜敢不拜嘉又二詩錄其一
云曾向承明並直廬當年意氣重璠璣登車已負澄清
志盛事猶存痛哭書雞黍喜來論舊雨雲山聊自共閒
居相看爾我俱垂老且向衡門賦遂初讀之可想見前
輩道義交契之厚

以刑部右侍郎陳汝器為安徽巡撫改兵部兼副都御
史調線一信為浙江巡撫

浙撫王維
珍卒官

予頃搜人後故事欲作人參譜未暇雜見於池北偶談

居易錄卷中讀坡集又得數篇其一紫團參寄王定國

帥中山
時作

其小圃五詠第一首為人參

居惠
州作

又次韻表兄

程正輔同遊白水山云恣傾白蜜收五稜細斲黃土栽
三椹自注云正輔分人參一苗歸種韶陽

黃山谷送顧子敦赴河東詩紫參可掘宜包貢青鐵無
多莫鑄錢

以大理寺卿喻成龍為刑部右侍郎太常寺卿熊一瀟

為大理寺卿

夷堅丙志云青城老澤平時無人至其處闕壽卿與同志七八人作意往遊未到二十里日勢薄暮鳥鳴猿悲境界淒厲久之山月稍出花香撲鼻諦視滿山皆牡丹也幾二更乃得一民家老人猶未睡見客至欣然延入布席而坐少頃設麥飯一鉢菜羹一盂揖客坐食翁獨據榻正坐俄出一物如小兒狀置於前衆莫敢下箸獨壽卿擘食少許翁曰儲此味六十年規以待老今遇重

客不敢藏而皆不顧何也取而盡食之曰此松根人參也

一日集朝房待漏冢宰熊公青嶽問少宰彭公羨門貴郡何名樵李諸公皆不能知余按李曰華君實云樵从木从雋木有所擣也嘉興徐氏園有李甘脆異常核止半粒無仁人云即樵李未知然否

堯峯顥暹禪師聞雷示衆云還聞雷聲麼還知起處麼若知起處便知身命落處若也不知所以古人道不知

天地者剛道有乾坤不如喫茶去此段公案可與伊川
答問雷起處語參觀

以光祿寺卿李錦為太常寺卿大理寺少卿錢三錫為
光祿寺卿

門人陳戶部子文

爽

說所見數奇姓算

真定人

香山東人 炁

音而最奇者崇效寺碑陰列名有斬姓又字之奇者山

安邑人

音如妾 奇

廠

又丙子河南試錄有千姓望姓順天府誌

有島姓大同有監生蒿姓三法司爰書有貌姓適

音

提姓

郝侍御惟謙妻勇姓

碧禪師者不知何許人駢姓居遼東山中

世祖皇帝聞其名累召不至遣索罷公召之師曰吾先行矣遂坐脫茶毘時空中現觀音大士及樓閣龍象蓮華種種之相繪圖奏之

世祖親為題贊

新城城隍廟住持僧明還年七十餘性朴誠不與人交閉門念佛旦暮灑掃殿宇虔奉香火所與往來者惟真

武廟趙雲山道士而已乙亥四月某日命其徒具浴浴
罷敷坐而化知縣桐城孫湘南元衡親往禮拜緇俗奔
赴其剃度弟子荆菴禪師成楚為下火負骨塔于法慶山雲

縣誌別

有傳

宗弟少司徒顓菴

拔

云少時聞太常公

時敏

言在徑山親

見雪嶠禪師將入涅槃召集大眾陞座說法竟呼茶茶
至笑謂衆曰喫一杯茶坐脫去也置茶椀而寂

列子程生馬馬生人林注云人草名也如前所謂人參

人面子也

天狗人參也天猪菖蒲也天牛雌黃也天羊雄黃也天

鼠防風也

海錄

漢武帝李夫人事史武紀封禪書作少翁桓譚新論作
李少君拾遺記作董仲君唐韋進士縷金裙記詩云不
教布施剛留得恰似初逢李少君

唐書文苑傳張昌齡兄昌宗官至太子舍人修文館學
士撰古史紀年新傳三十卷此又一張昌宗

擢安徽布政使司布政使李煒為山東巡撫副都御史

巡撫楊

廷耀罷

以大理寺卿熊一瀟為都察院左副都御史

副都御史黃斐卒

太常寺卿李錦為大理寺卿太僕寺卿楊爾淑為太常

寺卿

擢順天府尹蕭永藻為巡撫廣東都察院副都御史

高承

爵丁

甘肅布政使司布政使郭洪為巡撫甘肅都察院

副都御史

舒書病卒

田少司寇漪亭

雲

說巡撫貴州時有孝廉黃之驂耳不

能聽以眉聽古謂牛以鼻聽龍以角聽人亦有之

閩荔支有翰墨香者產銅山黃氏圃中石齋之祖別墅也石齋之生圃生荔一株結實三百六十五枚每歲實如之鄉試會試入翰林實倍之石齋死樹亦枯

擢湖廣總督吳璵為都察院左都御史河南巡撫李輝祖為總督湖廣兵部右侍郎兼都察院副都御史

擢河南布政使司布政使李國亮為河南巡撫副都御史

隋書五行志云高祖時上黨人家宅後每夜有人呼聲求之不得去宅一里所但見人參一本枝葉峻茂因掘去之其根五尺餘具體人狀呼聲遂絕蓋草妖也

康熙三十六年四月初六日明天壽山昭陵稜恩殿災初守陵內官見雷電遶殿火從中出遂焚以仁宗之賢而有是何哉

六月十五日于慈仁寺見文倅寫生花鳥十二幅極妍盡態中落花遊魚尤瀟灑倅字端容衡山徵明之孫女

趙寒山宦光子婦也

靈隱碩揆禪師昔與予別于揚州禪智寺今住常熟之
三峯即漢月和尚祖庭也丙子冬十月寺中桃花盛開
明年四月梅花又開花葉相間碩揆與老友錢湘靈
書來徵詩予賦六絕句寄之至則師已化去矣

陸燦

康熙二十八年餘姚烏山胡氏有牛產一麟狼項馬足
麕身牛尾遍體肉鱗金紫相錯明年七月蛟蜃出者以
千計餘姚大水縣西三十里有宋元符古屋一所當時

之人刻水痕于廳柱留示子孫是年水較舊痕增二尺五寸

康熙三十六年閏三月初七日鎮平將軍提督湖北湖南等處總兵官徐治都卒于位

詔贈太子少保諡襄毅治都正白旗人滇寇亂蜀自三峽窺荆岳治都時以總兵官鎮彝陵保鄣有大功夫人中礮死十八年以功擢提督戊辰夏逢龍之變治都自常德提師滅賊恢復武漢黃德諸府功尤偉三十三年

進位鎮平將軍

本朝忠勇之將與奮威將軍王進寶振武將軍孫思克
齊名乙亥入覲余曾于午門見之老成謙厚真儒將也
丁丑夏五月有通州漁戶張二娶男子王四魁為婦伉
儷二十五年矣王抱義子養之長為娶婦婦歸語其父
母告官事乃發覺解送刑部問擬流徒田綸霞司寇云
其人已年四十餘面施粉澤言詞行步宛然女子真人
妖也

特旨起用建言罷歸科道官原任給事中鄭昱彭鵬監察御史甯爾講吳升東

張方洲

寧

雜錄云嘗見侯家美石一方中有緋袍玉帶

人端拱而坐又先人曾發砌石一紫色者剖為二其中樹石茂密一冠帶人立樹下凝眸遠望若筆墨描畫者又家藏石蟹一枚具體如生以水磨之腥氣如蟹病目者稍塗兩背能已痛皆奇物也

以通政使司通政司官夢仁為巡撫福建副都御史

撫巡

丁永譽

太常寺卿楊爾淑為通政使僉都御史常翼聖

為順天府尹

刑部尚書翁叔元罷以左都御史吳璵為刑部尚書擢
兵部右侍郎張鵬翮為都察院左都御史都察院左副
都御史嚴曾渠為兵部右侍郎宗人府府丞劉元慧為
都察院副都御史太常寺卿錢三錫為宗人府府丞太
僕寺卿梅鋐為太常寺卿左通政吳涵為太僕寺卿

擢山西按察使司按察使巴錫為巡撫陝西僉都御史

巡撫党
愛罷

以內閣學士喀拜為甘肅巡撫副都御史

郭洪

罷

賜內大臣阿爾迪謚勤僖 康熙三十五年八月二十

八日

浙江溫州總兵官左都督一等阿達哈哈番贈太子太保蔣懋勲謚襄僖 康熙三十六年二月初四日

和碩康親王傑書謚良 康熙三十六年四月二十八

日

經筵講官刑部尚書圖納諡文恪 康熙三十六年六月初七日

議政大臣領侍衛內大臣佐領蘇爾達諡恪僖 康熙三十六年六月初七日

七月工部尚書薩木哈李振裕等上言

太和殿大工告成十九日

上御殿設朝并以額魯特噶爾丹蕩平頒

詔天下肆赦

命左都御史張鵬翮等十四人祭告五嶽四瀆及歷代帝王陵寢

孔子闕里舊例祭告遣侍郎以下遣部院正卿自鵬翮始時以鵬翮父在蜀特令往西嶽江瀆以便省覲蓋異數也又舊例嶽瀆遣侍郎學士副都御史等官陵寢以下遣京堂官今東嶽遣侍讀學士傅坤中嶽遣侍讀特默德南嶽遣侍讀學士張廷瓚顓頊高陽氏遣吏部侍郎阿爾稗黃帝軒轅氏遣內閣學士兼禮部侍郎顧藻

亦非舊例

丁丑會試以吏部尚書熊賜履禮部尚書兼掌翰林院
詹事府事張英都察院左都御史吳璵刑部左侍郎田
雯為總裁官中式滿漢舉人一百五十九名會元汪士
鋐江南長洲人汪予太學門生也原名僕

七月十三日殿試十七日

上御太和殿傳臚狀元及第李蟠徐州人榜眼張虞惇

華亭人

本姓嚴常熟人明大學士諡文靖訥之元孫

探花姜宸英慈谿人二

甲第一汪士鋐

宸英字西溟以古文名世四十年入明史一統志二館充纂修官食七品俸十餘年

上久知其名康熙癸酉始中順天鄉試年已六十餘至是中會試第八名殿試初擬汪士鋐一甲第二張虞惇第三宸英名在二甲第四及讀卷

上問進呈十卷中有姜某乎韓閣學莢對宸英在史館久臣識其字蹟某卷當是也

上云姜某讀書多能古文可拔置一甲於是升置及第
第三人而虞惇移第二士鉉移二甲第一宸英晚遇而
蒙

特達之知曠代所無也

二十五日甲戌科庶吉士汪俠等散館試于

乾清門辛未科探花黃叔琳甲戌科狀元胡任興探花

顧悅履已經授職外

榜眼顧圖河
給假歸不與

授編修檢討者二十

人

內查昇史申義閭錫爵戊辰庶吉士汪俠辛未中式
滿洲滿保傅森海寶三人漢軍陳夢球高其倬二人

傅森球辛未第一科道吳甫生江球二人球辛未部曹拉都立林文

英二人文英戊辰以知縣用張壽崗等六人壽崗辛未

內張逸少大學士玉書子隨旗行走五哥一人辛未中

陳豫朋戶部尚書廷敬子式禮部

右侍郎
努黑子

二十六日
御保和殿選庶吉士二甲汪士鉉等十三人三甲朱啟

昆等十八人內徐樹本故大學士元文子陳壯履戶部

宗豐故大學士正治子存珪麟故大學士之芳嫡姪孔
尚先至聖裔滿洲桑格查春阿爾賽常哥阿進泰傳敏

六人漢軍蔡璘一人舊例解元皆留館
是科四川解元任爾瓊不入選南充人

唐人宮怨詩云事與年俱往恩無日再中按秦王執留
太子丹與誓曰使日再中天雨粟烏頭白馬生角廚門
木象生肉足乃得歸如此用事可謂脫化

王充論衡末篇自叙家世云世祖勇任氣卒咸不揆于
人怨仇衆多父誦伯父蒙任氣滋甚在錢唐勇勢凌人
末復與豪家丁伯結怨徙上虞充生而恭愿仁順禮敬
具備矜莊寂寥有巨人之志在鄉里慕蘧伯玉之節在

朝廷貪史子魚之行又云母驪犢駢無害犧牲祖濁裔

清不勝

讀如妨

奇人鯀惡禹聖叟頑舜神顏路庸固回傑

超倫孔墨祖愚丘翟聖賢夫證父攘羊聖人所惡況暴
祖父之惡不啻自口出乎以舜禹孔顏自處而擬祖父
于伯鯀瞽瞍不僭且諄乎若王充者真人倫之梟獍也
蔡邕祕其書帳中以為談助豈不惑哉

太公名涓字子牙見羅氏路史又云老子始生名玄祿
鍾馗亦曰終葵羅泌云終葵商侯國後有終葵氏則又

姓也 商有於陵侯國書大傳散宜生之於陵氏取怪

獸白虎以獻紂羅云今淄之長山正吾鄉也 路史周

世侯伯首曰詩即邾國也漢書地理志云詩亭詩國水

經注春秋詩國也在濟寧州界 浮來山名路史以為

周世國名有公來山 雜國名有牆國曰廐也昭二十

三年有廐人 荏國泰山荏縣即地里志東郡荏平有

荏氏

杜疑切

盂國齊地在沂水西注陳仲子兄戴邑王

信為盂侯即此音蛤

漢景帝封后兄

鄆也鄆乃音冠蓋之蓋今

讀為蓋非 固水名在今延安府亦周國名也 蟲亦

雜國之名邾地後有蟲氏

昭十九年

柏人今趙郡柏人縣

即唐山也

蜀一作鄢杜預云泰山博平西北有蜀亭今兗

州奉符 郿潛夫論詹資郿翟黃帝之後玉篇資郿故
國黃帝之後封在岐山之陽所謂周原膺膺者此非周
之先何以其封地同又引大雅綿之詩也

羅長源云今之歷下等處發地悉是流水濟所過也東
阿之井正濟所溢故阿膠止濁住吐下隔而疎痰以濟

之性趨下清而不重故治淤濁逆上之疴

遼東之佟為

本朝望族按路史終國下云商有終古疑即佟後有佟

氏

見廣蒼北燕文人佟萬

又泚通今襄陽有泚水

嬴姓一十八國一曰時博昌有時水春秋之乾時是也亦見路史時水今屬新城縣

宗兄同年禮部左侍郎涓來

澤宏

黃州黃岡人每自署邾

城按黃岡東南百三十里邾縣故城楚滅邾徙之此若

春秋之邾婁曹姓則在任城今濟寧州地小邾亦曹姓

倪

亦曰邾

之分今之滕縣也又云一曰仙源今曲阜東南

四十里古邾城

吾鄉鄒平縣漢梁鄒地東都賦云制同乎梁鄒韓詩云

梁鄒者天子之田也故九成宮頌云司馬奉梁騶之典

詩騶虞亦作鄒虞

梁鄒命名豈亦有取于此者耶又西河有鄒

虞縣

路史云邢之堯山縣漢之柏人西十二里有南蠻古城

今相有古柏人城九域記引世紀為堯都縣東北二十
二里有柏鄉城與趙都柏鄉縣東西中分城冢記言堯
所置有堯廟謂堯登此眺洪水訪賢人者今唐山縣之
巖嵒山是也五代馮彥詩別後巖嵒讀如權施山上望羨君
時復見王喬

分野之說謬悠傳會予常疑之近見黃太沖宗義文集辯

之甚晰路史星次說一篇固先之矣文多不具錄其最
與予說合者如云春秋戰國地每遷變三晉未分晉果

何分秦拔西河魏當何屬周既東西何都而直鵠火陳
滅于楚何自而入韓分云云終云要以九州之分為正
此為直截不易之論費直蔡邕皇甫謐紛紛支離牽合
之談皆可廢矣

呂梁碑劉耽作字為小篆可認者僅六十言長源云甲
申秋七月觀于內相郭知章明叔家公異時嘗集錄古
碑刻多六一先生未見者二百斯其一也呂梁者龍門
也

非彭城
之呂梁

此集又在歐劉趙洪諸家之外人罕知之

浙江巡撫線一信疏請建雙忠祠于溫州略云康熙十三年原任溫處道陳丹赤永嘉縣知縣馬瑯值耿逆之變矢守孤城不意叛賊變起倉卒環刃脅降丹赤與瑯堅持臣節慷慨授命既同日而捐軀復全家而蒙難已蒙贈卹加銜光被泉壤而溫州府屬士民皆願建祠崇祀查福建殉難巡海道副使陳啟泰建祠任所奉有特旨伏祈

皇上俞允建立雙忠合祠于浙省以光俎豆以愜輿情

云云下部議允行奉

旨賜

御書扁額

狸一名不來見封禪書徐廣注周靈王時諸侯莫朝周
襄弘乃明鬼神事設射狸首狸首諸侯之不來者依物
怪欲以致諸侯諸侯莫從

六月

上在暢春苑出畫扇示內直諸臣禮部張英等

命各賦詩畫作二白鷺一青蓮華題曰路路清廉云
上御書懷冰雪三大字製扁額


賜都察院左都御史張鵬翮

命禮部尚書張英傳
旨頒賜

擢湖廣布政使王燕為都察院副都御史巡撫貴州

撫

閱興邦
卒官



居易錄卷二十八

欽定四庫全書

子部

居易錄卷

二十九
三十

詳校官侍讀臣陳崇本

員外郎臣牛稔文覆勘

總校官中書臣朱鈐

校對官中書臣方大川

膠錄舉人臣龔秉震

欽定四庫全書

居易錄卷二十九

刑部尚書王士禎撰

書言百獸率舞如舞馬舞鶴之類古多有之雜志云教舞鼈者燒地置鼈其上忽拊掌使其跳梁既慣習雖冷地亦然教龜鶴舞亦同此術予池北偶談曾記舞蠅虎事

列仙傳洪崖古倡家玄妙內篇云老子母無媚路史小異紀曰老子父乾元杲年七十二無妻與鄰人益壽氏

野合而娠十年而生皆妄誕誣罔可恨釋氏造天地經云摩訶迦葉降生為老子又可笑矣

邵陽民康乃心奉新城老先生閣下往二十年前曾於朋好處讀先生近體數首玉振金聲仰止深切而以雲泥異勢請教無由歲月蹉跎不學牆面老作咸陽布衣亦復何恨不意前秋偶客長安雁塔雅塗謬為海內大君子所見賞爾時伏首山谷一字弗知竟未獲負笈追隨久之友人有書來具言始末而拙句遍傳都人士口

矣秋中應試青門敏之上人始諄諄為語乃知楓落吳
江流播信不虛也私念老先生海嶽宗工握風雅之權
者已數十年十五國內外高士鴻文光燄萬丈收之囊
中為龍為鳳亦復何限奚取於窮鄉僻壤貧賤落拓孤
陋寡聞庸庸鹿鹿之一老儒下士乎古人云天下有一
知己可以不恨此言誠非敢居然當吾世而不能相知
後世誰實相知定吾文者悲夫又何其言之痛也徘徊
於中已將經歲乃敢忘其愚賤奉上一函庶人之分引

嫌固宜然再四予于非名非利無請無託或亦斯文未
喪吾道猶存風雨晦明諒為先生所不棄絕也舊刻數
紙自慚庸陋前有千古後有萬年得失之故知在寸心
倘邀靈渙岱蒙先生進而辱訓之真所云饑十日得太
牢也先曾王父舊仕犁邱家有遺文在故篋中似為太
先生大司馬公所贈者敬書一通奉覽臨啟悚慄伏唯
鑒在右康生字太乙邵陽人予丙子以祭告西嶽至長
安偶遊薦福寺小雁塔見塔上題詩三首記其一

題秦
莊襄

王墓

云原廟衣冠此內藏
野花歲歲上陵香
邯鄲鼓瑟應如舊
羸得佳兒畢六王
極賞其佳從遊門人武
進龔勝玉節孫曰康
郃陽名士也秦人語曰
關中二李不如一康
會予匆匆入蜀未及物
色之比歸而灞渭水漲
阻西安兩日水落遂行
至京師時道其詩于公
卿交游陸郎中儼庭

德元

往提調陝西學政為言
關中知名無踰李二

曲顥及康生者
明年七月康以書及所著
華野集來偶筆于此知
文章有神交有道少陵
不誣也

原任詹事府少詹事兼翰林院侍講學士高士奇請假侍養得
俞旨仍陞詹事兼侍讀學士

吏部右侍郎彭孫通工部左侍郎李元振皆

予告

調禮部左侍郎王澤宏為吏部右侍郎以內閣學士韓
爌為禮部右侍郎詹事府少詹事李錄予為內閣學士
兼禮部侍郎副都御史熊一瀟為工部右侍郎

沂水高中丞平仲諱名衡工詩畫後撫汴有功名崇禎

辛未初舉進士在京師手畫白練衣一稱寄其內張夫
人凡花卉二十五種作三十二叢著色生動備極姿態
又題五七言絕句凡八首略云對月偏成憶臨風更有
思鄉心無可寄聊寫最嬌枝花枝鮮且妍置之在懷袖
好記花枝新憐取衣裳舊輕襦畫折枝悠然感我思畫
時腸已斷著時心自知霧縠偏宜暑冰綃迥出塵著時
憐百朶應憶畫看人安邱張貞杞園作畫衣記

門人金德純言故戶部侍郎蔡弼漢公常使漠北天色

已晚欲投宿處而絕無人居倉皇間見大營柵人馬喧
闐因就之有如大將者三人坐帳中其下甲士數十輩
跪進酥酪方欲前顧視其人皆無下顏大驚而出上馬
急馳回視營柵已不見惟燐火無數隨其後追之馳二
十餘里乃免蓋古戰場云

陳君說滿洲鄰境輝發部落未滅之前一載每至日晡
輒有小兒千百為羣連臂入城覘人或入酋長之居或
散在人家提而擲之散如輕塵旋復聚為小兒形驅逐

祈禳皆不能禁國人夜不得眠日出始倦而就寢如是者年餘

太祖兵至已入城人無覺者自此妖亦不見

致仕總督雲貴兵部尚書卞三元諡恪敏 康熙三十六年六月二十六日

太子少保贈太子少傅靖海侯靖海將軍福建水師提督右都督施琅諡襄壯 康熙三十六年六月二十六日

勇略將軍總督雲貴兵部尚書一等精奇尼哈番趙良棟諡襄忠 康熙三十六年七月二十七日

門人丁丑狀元李蟠字仙李徐州人孝廉時常夢神人衣冠甚偉手一合子付之其中有黃金絲糾結如字形令諦觀之乃狀元二字也至是果及第

諸葛出師二表先儒謂與伊訓說命相表裏世說亦云潘勗作曹操冊命人謂與訓誥同風如所云則王莽金匱亦當與尚書並傳矣謬哉

彭羨門

孫適

少宰傳治腫毒初起方取雞子用銀簪插一

孔用明透雄黃三錢斫極細為末入之仍以簪攪極勻

封孔入飯內蒸熟食之日三枚神効

黃岡王御史同道夢澤

廷陳

雲澤

廷瞻

之從子也少落魄不

羈鄉人揶揄之遂發憤讀書再入省闈不見收自為文

告于城隍之神一夕夢神人謂之曰汝志固可取奈命

運何同道再四懇之神曰惟有一事尚可通融汝願之

否汝命中本有兩子若少生一子尚可得乙榜至于甲

科則不能也又懇曰生所願在甲科一洒鄉人之辱誠得之雖無子願亦足矣明日謁神復禱如前後果中萬歷壬戌進士入為御史巡按廣東罷歸竟無嗣少宗伯

慎菴

封說

王子雲一翥雲澤尚書曾孫崇禎庚午舉人楚名士也亂後隱廬山講學五老峯下一日與諸生同觀瀑布忽發問曰逝者如斯夫汝等作何解諸生不能對遂拂衣歸素與龔端毅公鼎善龔使東粵過黃州相見賦詩極

尊

懽或曰上巳時佳黃州地佳子雲人佳公詩不得不佳
戶部尚書陳廷敬戶部右侍郎王掞俱以原銜充

經筵講官時予先為講官戶部三人皆在

經筵亦盛事

二十七日

御文華殿舉

經筵吏部尚書熊賜履刑部尚書傅臘塔進講中庸知
仁勇三者天下之達德也二句禮部尚書掌翰林院事

張英禮部侍郎掌翰林院事阿山進講尚書洪範凡厥庶民極之敷言是訓是行以迓天子之光三句講畢賜宴太和殿前

十月朔

上親祭

太廟是日

頒康熙三十七年時憲歷

本朝典例滿洲部院大臣必歷內閣學士乃得充

經筵講官歿得謚文其官詹事府侍讀侍講學士祭酒
以下者不得與

自平定額魯特後

國家幅帟益廣西北諸部落盡隸典屬國三十七年戊寅
時憲歷所列有杜爾百特札魯特札賴特郭爾羅斯科爾
沁土默特阿祿科爾沁奈曼烏朱穆秦教漢阿霸哈納蘇
尼特蒿齊忒毛明安阿霸垓巴林喀爾喀喀喇沁翁牛特
克西克騰吳喇忒鄂爾多斯歸化城四子部落盛矣哉

新安門人汪洪度于鼎寄羅鄂州小集及鄂州所著新安志爾雅翼又程嘉燧孟陽手書松寥吳裝雪浪等集三種萬厯中刻於長治甚工

昌化知縣門人林霖培寄傳燈二錄林間錄東坡表忠觀碑碑為明嘉靖三十九年杭州府知府陳柯重刻十月初七日武進士傅臚狀元繳煜章京衛人甲戌會試中式余戊午典順天武鄉試所取士也戊午一榜有三狀元己未羅淇乙丑徐憲武丁丑繳煜章

杜詩從人覓小胡孫一首第三句云舉家聞若駭下云
為寄小如拳結云許求聰慧者童穉捧應顛殊不貫宋
劉昌詩蘆浦筆記云合移童穉句作第四移為寄小如
拳作結則一篇意義渾全亦成對偶甚有理而朱長孺
不采其說想未見此書耶然此詩殊不成語

鎮平將軍提督湖廣左都督拖沙喇哈番贈太子少保
徐治都諡襄毅 康熙三十六年十月十八日

允禮部尚書張英疏辭免掌翰詹事以禮部右侍郎韓

災兼掌翰林院事少詹事兼翰林院侍講學士顧祖榮
陞詹事府詹事兼翰林院侍讀學士掌詹不設正員八
九年矣至是乃有專官

杭州孝廉高式青說其鄉張氏藏書甚富造樓水中度
置甲乙悉有次第以小舟通之晡後即禁往來一日忽
有烟氣出樓牕大驚往視之則門扃如故比登樓烟亦
不見如是者三最後細檢視烟自書櫥中出開櫥則凡
天文奇遁之書悉為燼惟空函在焉餘書無恙

十月一日

駕謁

孝陵

丁丑冬十月右安門外有回回買一牛將入城屠宰牛過裕親王園遂奮身逸入回回逐之牛初奔騰繼以跪伏哀鳴百方不起觀者殆數百人皆歎異忽一市猾從旁擲榆曰汝何愚甚牛既難致何如取刀礮來就此屠之不易易耶回回如其言牛遂立死市猾歸是夜覺

徧身骨痛明旦視之生疔毒數百痛不可忍見一牛在
前索命呼號宛轉三日竟死張杞園貞說

書奕云羿夢與洛水處妃交故天問曰妻彼洛濱是遇
洛妃者不止一子建也而羿妻又入月為嫦娥皆不可
詰

胸臆字音潤蠢地即夔州雲安縣胸臆蚯蚓也而馮元
成以為蟬云兩字皆從月是物月之精旁句忍者月如
句如刀環而是物生也按字書二字皆从肉不从月尤

穿鑿無稽

長安客話載明時太醫院例以端陽遣官於南海子捕
蝦蟇取酥製紫金錠今端陽節中官猶于端門鬻內造
紫金錠是其遺製也

丁丑十一月初九日長至

上親祀南郊余與王顥菴少司徒揆田漪亭少司寇震

顧觀廬詹學祖榮候

駕午門因談及新舊唐書余言舊唐書載薛懷義于外

戚傳此最可笑又漢書元后傳有弄兒不知是何等人
大抵漢唐宮掖多難言之固未易枚舉也

十一月十七二十等日京師地屢震

詔問九卿致災之由因

諭修省

謝南衡者武昌人本朱姓嘗遊黔蜀間至大寧洞洞有
一黃冠兀坐如枯株問之不答試手觸其冠應手墮地
為灰旁有一印文曰大寧巡簡司蓋此人明世為是官

鼎革後避地修真于此坐脫印故所佩雖入定未嘗捨也洞深處石壁有羅念菴題一絕云海門千丈浪如山一轉千年瞬息間洞裏聞雷催雨急作龍爭似作魚間世傳念菴仙去明天啟間曾至吾邑訪先太師公又訪煙客於太倉少宰涓來兄澤宏嘗遊南嶽見其手植松高不數尺而甚蔥鬱道流言念菴先生佳靜處皆不可知也

康熙辛未京城內彌陀菴三官像一夕自移右安門外

三官廟中如人位置者然

少宗伯慎菴

封

言羅田縣近城山間有僧菴本南向一

夕大風僧已寢旦起殿宇戶皆北向矣

吏部員外郎艾某滿洲人自言行開平道中日方午天
無片雲忽見一物自東而西疾于飛隼長約二三丈其
首髻髯如畫龍狀其末漸細條于空中倒垂而下又有
一物從東來追及之二物蜿蜒相糾離合數次如戰鬪
之形久之乃解一向北一向東徐去

偶見一帖牡丹詩題曰開元初紀號李邕書而詩中有
號國邊鷹等句殊可疑訝

內府藏大照禪師碑李北海真蹟也後有陳惟寅跋謂是硬
黃本筆墨完好首失五行後為蘇滄浪所補云云華亭董
尚書跋二則謂永嘉黃翁年八十歲嘗奉幕府檄渡遼海
入樂浪為日本朝鮮講和歸時購得唐硬黃李北海大照
禪師碑人間石本不傳又云余所見唐人硬黃生平只三
本嘉禾之萬歲通天帖安福之右軍絕交書與此而三此

卷為俞仲茅少卿購藏鼎革已來不知流轉幾家而終歸
秘府物之顯晦有時哉

門人徐蘭吳人字芝仙能詩工繪事從安郡王出塞嘗
見祁連山中花十數種皆艷絕不知名中土所未有也
曾畫便面貽余又有出塞詩數十篇聞見詭異足備塞
外風物考證云起輦谷元世祖陵無封樹獵者或踐其
地輒有風雷之異其詩云聞昔朱明修祀典曾命禮臣
巡禹甸伏羲下逮宋理宗三十六陵皆祭徧祁連因未

入提封欲齋香帛無由從掃階席幄順天府春秋遙奠
青芙蓉芙蓉青青亂雲宿中有三間老瓦屋征人遙望
綠琉璃知是元家起輦谷谷口番僧通漢字留客招提
話遺事自言歷劫悟前身親見陰房築空翠巫媼纔牽
靈馬來聖僧已渡流沙至

元僧綽爾濟

維時指點白毫光爭

覩君王顯神異天花鋪地坐親親夜半山頭分舍利

元祖

火化時得舍利甚多

東方日射雲窈冥背人入山埋寶瓶地下有

天黑如漆祕祝才宣役萬靈亂峯高下化機械俄頃萬

壑藏雷霆雪清風吹不數日依舊滿天芳草青往年有
客挾弓弩誤入雲中踏玉虎千雷萬霆出谷飛百里人
家苦靈雨至今鹿兔滿巖阿馬蹄不敢驚黃土問余到
處訪雲蘿中國名山想遍過聞道長陵在天上此中靈
異更如何又所過古廢城凡六曰單于曰蘇武曰雲內

唐立雲中都督府
即中受降城之地

曰豐州

唐九原郡城北有鵬鵠泉有
延祐七年碑李文煥書撰

曰殺虎曰土城土產凡五曰白草曰雛鷹曰麀鼠曰瑪
瑙石曰酪酒瀚海距獨石口二千里有明太宗永樂八

年御製碑凡五十一字云

丁丑長至後京師已三見雪一日會議坐朝房或問余
古人雪詩何句最佳余曰莫踰羊孚贊云資清以化乘
氣以霏值象能鮮即潔成輝陶明淵詩云傾耳無希聲
在目皓已結王摩詰云隔牖風驚竹開門雪滿山祖詠
云林表明霽色城中增暮寒韋蘇州云怪來詩思清人
骨門對寒流雪滿山此為上乘若溫庭筠白馬夜頻驚
三更灞陵雪亦奇作也近人唯見熊侍郎雪堂

丈舉輸與

黃巖僧補衲滿天風雪未開闢二語差佳至韓退之之
銀杯縞帶蘇子瞻之玉樓銀海已傖父矣下至蘇子美
既以粉澤塗我面又以珠玉綴我腮則下劣詩魔適足
噴飯耳

京官各衙門相稱謂皆有一定之體蓋沿明舊如內閣
部堂彼此曰老先生翰詹亦然給事中曰掌科御史曰
道長吏部曰印君曰長官自

國初已來皆然余已巳冬再入京師則諸部郎官以下

無不稱老先生者矣此亦觚不觚之一事也

前漢書甯成傳曰虎而冠後漢書有狗而冠人罕用之
朝鮮國王李焞上疏告饑乞糴奉

特旨賜米二萬石賑之又以綏哈城小姐廟二處所貯
米二萬石運至中江貿易以戶部右侍郎博和諾往監
糴又命長蘆鹽商領帑金五千兩買米二萬石由登州
府廟島地方以雞頭船運往朝鮮貿易以吏部右侍郎
陶岱往監運

庫庫諾爾台吉渣什巴圖魯等入覲十一月至京廿七日

賜宴

保和殿并

賜貂帽貂裘等物封渣什為親王那木占額爾德尼貝勒彭蘇太濟貝子

擢山東布政使張劬為巡撫浙江右副都御史

浙撫線一信罷

河南提學道張仕可字惕存京江相國素存弟也父公

選

九徵

先以吏部為河南學道父子相距三十年江西提

學道王式穀字誨存睢州人大理少卿公垂

紳

子也祖

去非

震生

先為江西學道祖孫相距二十八年余官京師

三十餘年間皆及見之

南部門人李侍御子來

先復

說前知大冶縣見柯陳氏譜

云陳友諒子理敗亡入蜀改姓鬱居合江縣子孫繁衍
散在涪州長壽諸邑明末兵部尚書陳新甲其後也後
理年八十攜一子再入楚居興國州其子姓尤繁衍不

下萬人即今柯陳是也

高淳隱士吳越彥字季舒性狷介不喜交遊偶以訪舊
來京師窮途賣卜常手署寓齋之壁云此來除王阮亭
外誓不謁一貴人丁丑歲除訪予邸舍自述如此

朝房晤張天師

繼宗

言三十四年往南嶽建醮過龍陽縣

山中有一洞洞口白楊一株樹腹空洞不記年代中穴
妖物其色白每出所過人畜一空禾稼盡枯死江行遇
之舟皆覆溺為祟一方且數載矣縣之父老懇請勦除

天師先寫符數道遣其弟子輩賁入洞偵之洞極深廣而空無所有惟有髑髏及牛馬骨可數十石既還報乃令知縣鑄鐵牌四皆高丈餘立於洞門又以符篆召神將下擊妖遂遁于沅江為崇如故父老又以告乃又鑄鐵牌立于江岸要害處而召神將急擊之旋有一白羊死江面其妖遂絕

門人李侍御

先復

說蘄州今不產蛇蛇皆渡江而南產于

興國州地氣物理遷移如此不可曉也

考選科道

命各部保舉郎中員外郎賢能者予舉戶部湖廣司郎中張睿四川司員外郎卜峻超引見睿授工科給事中峻超授江西道監察御史睿淮安山陽人峻超順天固安人

睿今為副都御史

漢書註有曰臣瓚者昔人謂不知為何人今按晉中書監和嶠嘗領命校正穆天子傳五卷瓚乃其校書官屬郎中傅瓚也後人取其說以釋漢書故有臣瓚註語見

陳寔兩山墨談

十一月二十二日

上諭諭吏部地震示儆朕深切敬惕念致治之道無如
愛民生重民命朕總攬幾務於一切閭閻生計及人命
事情罔不殫精研究在外直省親民之官務訪求民間
疾苦實心愛養其關係人命案件必詳審真確出入允
當俾無冤民在內大小官員咸宜勤慎奉職力改過愆
以共副朕實圖修省弭災之至意爾部即通行申飭

十二月大學士張玉書給假歸省

尺木禪師者名性休明宗室也得戒于崆峒天鼓得法于漢陽後退住沁州之永慶寺順治癸巳正月二十三日早齋罷忽問院主十王殿前那塊地是我底捨底麼院主云捨底遂趺坐而逝夜半復醒書偈云莫笑尺老師風大行不得回來轉金經方入三摩地至二月二日出定沐浴削鬚髮持杖侍者扶至塔前化老比丘相說偈云思不來想不來自己打墓自己擡也奇哉也怪哉

臨濟兒孫善活埋咄者是什麼所在說死說活擲杖而
化嘗題漁父圖云東西南北任遨遊萬里長江一葉舟
夢裏不知身是客醒來天水一般秋有銅鞮語錄播于
叢林

江寧門人畢禧貽陸包山治畫幅十二幀每幅後有蔡
林屋羽題贈啟之詩凡十二篇書畫皆入逸品林屋草
書尤逼晉人包山自跋云啟之幸從林屋先生得詩十
章予乃圖之則又幸附啟之之冊者也觀者不以象外

求之則予之負林屋者多矣歲己亥三月陸治識首有
許初元復題字惜不知啓之為何人

三十七年戊寅正月二十七日

駕幸五臺庫庫諾爾親王渣什等皆從

吳江潘檢討次畊未貽宋刻陳后山集任淵注凡二十

卷有白川書院及周氏懷新堂圖記又寄所刻顧亭林

炎武日知錄三十二卷亭林潘之師也

田綸霞司寇以中丞撫黔時有卒俞賢者所乘馬齒六

十矣自其父兄以至于賢歷數十年大小經數百戰而
驍騰如故不食生芻日需豆糜三升酒五合耳能通人
語高下疾徐東西南北語之無不如意天壩之戰馳險
阨犯瘴癘芻糧久絕獨此馬不困益壯司寇著黔書備
載其事云

阮通叅于岳

兩詢

示趙松雪畫杜子美戴笠圖深衣烏帽

加竹笠其上足躡芒鞋昂首袖手若行吟之狀下方有
趙子昂氏及松雪齋二印上有劉崧子高題絕句云杜

陵憔悴鬢如絲飯顆淒涼日午時云云自跋云右草堂杜拾遺戴笠小像吳興趙文敏公所畫往年余得之高安劉氏它日與

關

徵士觀畫于桃源山中因持以歸

之併題識其上云洪武庚申秋仲珠林生劉崧書解春雨又題七言長歌一篇書法精勁類邢太僕云碧雞坊裏春風顛浣花溪邊晴日暄浩歌

關

花弄影慷慨

關

開元前飯顆山頭憶相見歷下新亭舊時面吟詩未遣髭鬢愁愁絕胡塵暗河縣平生落筆五嶽搖調笑不

作兒女嬌錦袍仙人伯仲耳誰謂有作徒相嘲詩卷長
留雨不減玉顏癯骨俱清絕萬古詩人照膽寒松栢蒼
然傲冰雪吳興公子真天人

閩

影自與韓衆親新圖

古色照秋水如此子美方逼真槎翁老仙我所敬十年
寤寐遊珠林新詩妙墨聚片紙令我觀之諧夙心嗟余
豈是諸公徒青天空行一事無紛紛餘子風斯下獨立
惟見明星孤吁嗟杜陵焉可呼前翰林解縉書右詩不
見本集予平生所見惟故友宋荔裳

琬

所刻秦州像何

宇度所刻成都浣花草堂像皆石本蓋皆臨松雪畫而風神不及遠矣阮云是故友施愚山

閩章

家藏物

書奕

黃東石著

引春秋元命包云姜嫄遊閼宮履大人跡而

生稷今章邱有神跡祠即姜嫄所履宋濟南太守蕭承之立祠此山妻學履之是生齊帝此說志書未引之然姜嫄何緣至今章丘事屬難稽果爾則章邱一邑而周室南齊兩朝之祖皆肇跡于此亦大奇矣

原任刑部左侍郎高珩卒遺命不請卹不報喪不受弔

珩字葱佩別字念東淄川人明崇禎癸未進士學仙學

佛數十年至是卒丁丑十一月二十一日也年八十六

曹縣王中丞叔武

崇禎

文雜說云正德十一年河北旱饑民

發曹操疑冢凡十三處皆有屍及銀花燭臺之屬內一

冢磨甕為室屍卧土牀無棺槨青巾黃衣黃鬚黑髮宛

如生者蓋用水銀以殮故不腐也然其為操疑冢與否

亦不可考

甘肅巡撫喀拜疏稱甘肅五學士子自設科已來從未

中式請將涼州西寧五學編聿字號左甘州肅州五學
編聿字號右遇止中一名之科將十學共為較閱取中
遇增中一名之科聿左聿右各中一名部議允行

五代馬或贈韓定辭詩巖嵒山見顏氏家訓予池北偶
談已詳之其首句云燧林芳草綿綿思盡日相攜陟麗
譙燧林未詳出處考拾遺記云燕昭王遊于西王母燧
林之下說燧皇鑽火之事在申彌國近燧明國去都萬
里則非燕地明矣王子年著書皆杜撰韓馬特引此以

矜奇炫博非事實也

書爽云大食王遣人之海上見一方石石上有樹枝赤
葉青總生小兒不語能笑手足著枝上疑即人參果也
吾鄉泰山收碧霞元君祠香稅自明正德十一年從鎮
守太監言始

明太祖洪武初却貢香米人參蒲桃酒以勞民故也見
食貨志

書曰詩言志故文中子曰大風安不忘危其霸心之存

乎秋風樂極哀來其悔志之萌乎

仲長子光瘖者

子光字不雕

而中說載其言甚多如語賈瓊

曰在險而能奇不如宅平而無為薛收問政於仲長子
光子光曰舉一綱衆目張弛一機萬事隳文中子謂仲
長子光曰山林可居乎曰會逢其適也焉知其可若此
者不一唐書謂其瘖而隱有問道者劍書老易二字示
之與王無功未嘗交一語而對酌甚懽似非實錄或大
業之亂暫托于瘖以避禍耶

田司寇綸霞

雲

云德州陳副使宅築室掘得一古冢中

有女子髑髏二具皆無首首乃範磁為之鬚髮眉目宛

然不知何代物也又德州趙侍郎宅亦掘得古冢中有

女子髑髏一枕一磁枕枕上有杜詩百寶裝腰帶四句

又云謝青墩相國

陞

墓側地中得一磁甕墨色光可以

鑑因移之第中一日甕中現美人影纖毫畢見宛然圖

畫蕭侍讀韓坡

惟

往視之現一老僧像杖笠皆具自是

日往視者甚衆所見鬼神帝釋羽流之類各各不同月

餘無所復睹矣

康熙三十六年七月十九日

恩詔三十九年會試中式進士三百名禮部疏題明查
會試每科漢人取中一百五十名滿洲蒙古取中六名
漢軍取中三名共取中進士一百五十九名今應將

恩詔所加一百四十一名內漢人加中一百三十三名
滿洲蒙古六名漢軍二名

二月二十二日

駕歸自五臺諸臣迎

駕于

暢春苑

以前總督河道于成龍為兵部尚書兼都察院右都御

史巡撫直隸

以總督管撫事

兵部督捕侍郎李鈞為兵部右侍

郎兼都察院右副都御史巡撫山東

直隸巡撫沈朝聘山東巡撫李燁罷

居易錄卷二十九

欽定四庫全書

居易錄卷三十

刑部尚書王士禎撰

浯溪新志言黃山谷題魯公磨崖碑詩凡一百八十餘字刻中興頌之右順治中永州府推官某過而賦詩屬祁陽令刻之石令媚推官輒鐫去山谷書一角刻焉千古名蹟一旦刳缺志載之災異宜矣

宋文憲公濂集有題長白山居圖詩云滿地雲林稱隱居燕泥汚我讀殘書五更風急鳥聲散時有隔花來賣

魚子撰長白山錄未及載入因錄于此然不知為何人作也

三月初一日補行

經筵于文華殿吏部尚書庫勒納熊賜履進講中庸中
也者天下之大本也二句禮部尚書張英刑部尚書傅
臘塔進講易繫辭唯深也故能通天下之志二句講畢
賜宴太和殿前

新定創參之例創參人親王一百四十名人參七十斤

世子一百二十名人參六十斤郡王一百名人參五十斤長子九十名人參四十五斤貝勒八十名人參四十斤貝子六十名人參三十斤鎮國公四十五名人參二十斤半輔國公三十五名人參十七斤半護國將軍二十五名人參十二斤半輔國將軍二十名人參十斤奉國將軍十八名人參九斤奉恩將軍十五名人參七斤半准免關稅餘參每斤納稅六錢其出關買參之人准于盛京開原等處採買不許于打牲之處採買云

以王國昌為兵部督捕右侍郎

前督捕右侍郎丁憂服闋

改督捕侍郎王國昌為兵部右侍郎兼都察院右副都

御史巡撫山東

巡撫李鈞未任以病予告尋補安徽

丁丑冬有

旨三品以上朝官年及六十許乘肩輿入東西華門至

闕門蓋

聖朝優老之意先是百官皆由長安門出入惟內閣由東華門然亦必易馬始得入又滿洲閣部大臣皆騎無

肩輿者自是亦多乘肩輿矣

河南巡撫李國亮疏言滎澤縣北臨黃河丹沁二水會
歸黃流逼近城下查滎陽郡舊基高阜將縣城移建于
此可永無衝決之虞部覆不允得

旨這遷移滎澤縣城着照該撫所題行

估計銀一萬二千兩部允先動

支地丁銀

八千兩

華亭門人王原令詒說雲間人蕭中素字芷涯木工也
居亭林好為詩往往多佳句晚年傳藝子孫從受詩者

數十人又有鍛工胡姓號良甫居茶山亦好為詩而不
及蕭云

南渡馬阮用事濁亂極矣惟追復懿文太子諡廟號興
宗追上建文帝諡曰讓皇帝廟號惠宗景皇帝廟號代
宗補二百餘年未舉缺典又追封開國功臣傅友德麗
江王諡武靖馮勝寧陵王諡武壯又予遜國忠臣諡方
孝孺文正景清忠烈鐵鉉忠襄徐輝祖忠貞之類此天
理人心之至公不可以亂邦沒其一節之善也

甲乙事案載兵科給事中陳子龍疏云清歌漏舟之中
痛飲焚屋之下想見金陵當日馬阮當國光景欲為東
晉南宋豈可得乎

槎杯元銀工朱碧山所製有古篆二十八字云欲度銀
河隔上闌時人浪說貫銀灣如何不覓天孫錦只帶支
機片石還朱名華玉浙之秀水人杯是故吏部孫侍郎
北海承家物

山西某方伯家富鉅萬子孫敗其產其孫某不慧至持

銀梳行乞于市陳大司徒說

御史荆元實請以宋范仲淹從祀

聖廟下九卿集議不行元實號敢言後假歸予為左都御史留之再三不得以病卒于天津舟中

戊寅六月

上聞廂白旗原任步軍校博爾輝年九十有九引

見暢春苑

召戶部左侍郎庸愛諭給金俸米三十八石銀八十兩

終其身又

命八旗都統查男婦高年者以

聞又得三人其一百六歲一百三歲皆

賜銀布有差

五月山東巡撫王國昌進長人鄭克已長六尺八寸兵部以

聞召見景山

賜食留侍禁中克已新城人業農故山西寧武道僉事

獨復浙江嘉湖道僉事問玄之族也是時年三十二

秋

陝西亦進長人某其長與
鄭等予于 乾清門見之

宋任淵撰山谷精華錄八卷詩賦銘贊六卷雜文二卷

宋槧本也有章邱李中麓太常

開

圖書印記淵自序云

萬寶集于前則萬其價萬其色因不無去取擇而千之

亦自具一可否有上選焉黃太史山谷集幾萬其篇章

走常節其要而謬注之什之一也然其間猶有幽蘭叢

桂奇玉特殊萃類拔出者又別帙焉是上選也一日雷

子誠過而見之喜欲授梓來索實版故併述其所以然而與之天社任淵序按淵即注陳后山集者惜錄中取舍未愜人意耳

戊寅六月保和殿大學士兼戶部尚書張玉書丁母何氏憂七月初二日以刑部尚書吳璵為保和殿大學士兼刑部尚書

雲南巡撫石文晟疏言元江廣化廣南廣西四府界連粵西南太慶思四府之外烟瘴特甚請援粵西例于滇

省內地郡守之中特疏調補三年俸滿照臺灣例即行
陞用又鶴慶順寧永昌三府及臣另疏題改府治之北
勝州鄰逼蒙番接連中甸外即烏思藏之地甚為緊要
嗣後鶴慶等府缺更祈簡選賢能之員五年稱職亦即
陞擢部覆得

旨允行

祭告五嶽四瀆帝王陵寢

先師孔子闕里舊例遣侍郎副都通大至四品京堂而

止翰林則閣學掌詹至少詹而止予為祭酒日曾與禮部言及輒云例不開列丙子之役則讀講學士雲麾使皆列名矣丁丑之役則祭酒已下至諭洗讀講悉列名矣不知例起于何年也

戊寅六月得洪洞范彪西

鄆鼎

書略云丁丑三月恭捧手

教確是講學之書即如論文成一節名正言順馮恭定公有言除却氣節事功文章將于何處見道學先生云陽明即不名道學而氣節事功文章皆是第一流人物

先生豈止以道學予文成哉為萬世立公論為昭代嚴
祀典也近日時文選家竟指文成為異端狎侮前哲訕
謗學官先生謂其無羞惡之心某更謂其失為下不倍
之道也至于黃梨洲學案曾見原槩屬意處專在文成
亦屬偏見某取其收羅明儒之富兼取其自序處不諱
淺深各得醇疵互見之意故統錄之以備參考此霍渭
厓之所以失入也先生公論竊欲添注于渭厓幅中以
見後人眼目欺瞞不得誠有如東林諸賢會議者可否

候裁敝鄉辛復元先生學本闇然某雖極力表章而人微言賤今不與荒烟蔓草同歸滅沒者實自康熙二十二年十月十二日大疏始矣跡此舉動因輒以小刻備考兩集僭瀆左右妄干玄宴既荷俞命敢不拜嘉河東分守吳公入境即齒芬見及雖未謀面一時枯木春而冷灰然先生之德愛憶甚矣過矣長白山錄考核博而有要篋中著作如織倘惠然肯來引領望之

沈作喆寓簡云許詢與沙門曇彥同建浮圖未成而詢

亡彥長年及見詢後身為岳陽王譽鎮越州云云按玄
度與王謝道林同時彥安得厯宋齊梁未尚在殆不足
信

特擢工科給事中彭鵬為貴州按察使司按察使

容齋隨筆載樂府有白鵠鹽神雀鹽即昔昔鹽刮骨鹽之類

以宗人府府丞金璽為左副都御史

副都御史劉元慧休致

原任禮部左侍郎兼翰林院學士嚴我斯卒嚴湖州歸

安人康熙甲辰狀元

予告在籍

友人顧炎武字寧人別號亭林按顧野王讀書處名顧亭林在華亭

以太常寺卿梅鋗為宗人府府丞

上用人慎重多

命內閣下詢九卿予從來不敢徇請託未嘗輕薦一人
丁丑戊寅間以吏部開列應陞人數內而聞見最真者
三人從公首言于衆幸不拂于清議獨蒙

點用則臨江府知府李濤以舉陞兩浙都轉運使襄陽府同知鞠宸咨陞潞安府知府鄖陽府知府衛台瑞陞陝西潼商道副使內李鞠皆山東人定例同鄉不得相薦舉予云

明旨下問惟期得廉能之官知而不言則虛

上咨詢之意故破例言之以俟公論云又常舉河南按察使孟世泰尋陞貴州布政使予忝九卿已九年所推薦不過此數人然其人皆不知也

賜禮部侍郎掌翰林院事韓莢

御書篤志經學四大字

以都察院掌院事左都御史張鵬翮為刑部尚書

擢戶部左侍郎王士禎為都察院掌院左都御史

康熙三十

七年七月十三日

以都察院左僉都御史王焯為太常寺卿大理寺少卿
王紳為僉都御史

戶部右侍郎王揆轉左侍郎以都察院左副都御史錢

三錫為戶部右侍郎太僕寺卿吳涵為都察院左副都御史通政使司右通政勵杜訥為太僕寺卿

沈氏大姑者本紹興人父達仁僑居京師以字同郡朱謙穆謙穆幼孤母龔氏年十九苦節撫子迄于成立家貧賴其舅某贍廩以給朝夕康熙丁丑之秋始納采沈氏以貧故未能娶也無何謙穆病且篤大姑聞之自誓歸朱脫夫有不諱願奉孀姑終身言已即日命駕歸朱氏居五日謙穆死大姑撫屍一慟而絕康熙戊寅六月

二十八日也年甫十九夫婦死不踰日有八十老人蔣
玉生者叙述其事傳之而詞不雅馴予因略次之如右
七月二十九日昧爽

大駕發京師謁

永陵

福陵

昭陵由古北口出塞

命總督管直隸巡撫兵部尚書于成龍原任總河兵部

右侍郎王新命開霸州新安等處新河告成

賜名永定并

敕建河神廟于保定府

御書賜額七月

命會視漳滏二河

允貴州布政使王毓賢請建其父原任四川提督王之

鼎祠于貴陽府

御書賜額曰忠節垂芳

之鼎殉
節貴陽

以都察院左副都御史金璽為偏沅巡撫

巡撫鳳起罷

以宗

人府府丞梅鎬為都察院左副都御史太僕寺卿勵杜

訥為宗人府府丞左通政錢晉錫為太僕寺卿

副都御史額倫德公說京師一少年好吹橫笛每風月
之夕輒操數弄一日日未暮坐院中手笛吹之忽有綠
衣小兒自外而入頃刻至數百人結束如一堦墀盡滿
懼避室中引被蒙頭而臥久之寂然聞其無人不知所
往自是不敢復吹笛

副都御史吳匪菴

涵

說宜興許生者年十七八居近村

一夕入城玩月長橋橋上先有二女子皆姝麗與許目
成久之是日宿于其親某家漏下二鼓聞扣門聲啟視
之即長橋所見侍婢也曰小姐申意許郎有夙緣明日
歸當來議之許不知所謂唯唯而已明夕獨坐村墅婢
果至申前約許曰當告父母耳父怒曰此非人也何議
姻之有叱婢去又明日婢再至曰小姐來矣言未既女
子已入室中光豔照人真絕色也請見其母母悅其美

豔柔順許之奩具幃帝之屬咄嗟備陳于室多非人間
所習見者許乃與定情焉踰月其父往投訴于城隍之
神女子已知之謂許曰翁疑我我何面目居此且與君
夙緣止此今當去矣妾已妊他日當使采蘋來邀君一
至山中為別采蘋婢之名也遂去奩具之屬亦不見踰
歲采蘋果來邀許俱行令閉目頃之已至山中峯巒秀
麗一洞崦嵫中啟采蘋引許入所見奇花異鳥迥非人
間有美女數百人皆鳴機織作錦綺炫目不可名狀女

迎許入閣設榻坐視之則星冠霞帔為女道士裝謂許
曰郎別來無恙翁姑無恙向所姓今已生女故欲君知
之然不可將歸且留山中為擇佳配因叩以夙緣之說
曰妾前生唐開元宮人也君前生亦為內侍一夕偶語
有婚姻之約為上所見箠殺之君投胎已歷數世妾誤
託孤身賴勤修煉得證仙籙以夙緣故訪君陽羨得遂
昔盟且為君生一女夙願畢矣請從此辭當令采蘋時
通消息勿以為念因贈以二葛奇妙光瑩云歸獻公姑

許欲留止尋伉儷之好不可曰緣盡矣慮有幽譴遂令采蘋送歸後十三年任少京兆宏嘉字葵尊亦縣人也一日同一士夫訪許之父方飲酒而采蘋至曰所生女已能通五經將適人矣輒來相報聞座客方談易采蘋笑曰諸君所說皆俗諦耳經意殊不爾因請之講乾卦妙義皆出意表因言女子早通五經此皆夙昔所聞非以臆說女子博通百家二氏之書不僅諸經也采蘋至今尚往來許氏不絕女子則不復至矣

同年秦宮諭留仙

松齡

寄所輯著毛詩日箋屬予序書云

詩之必用古序先儒言之詳矣然首句確有承授不可移易後序未免雜以講師之說或非詩之本意潁濱詩傳止取首句不為無見注疏之外則歐陽氏蘇氏呂氏嚴氏李氏黃氏多所發明朱子斥棄舊說遂使美刺之意盡亡然其中有不悖古序文從字順亦有勝諸家者未可廢也明儒則郝楚望何玄子二家最善松齡誦習之餘間倣黃氏日鈔之例於諸家之說稍為折衷而偶

有鄙見亦附著焉云云此書所論與予夙昔之見頗同其所采取亦甚簡當當為序而傳之

梁溪秦靖然字藥師宮諭從子以宮諭命來執贄貽予宋槧韓文公集歸震川家舊物也有熙甫印記是宋寶慶三年承議郎特添差通判南劍州軍州王伯大音釋有伯大序所謂留耕王氏者即其人也今坊本韓文考異無此序

譚公道者惠州人幼為人牧牛後得道羅浮一日降乩

題王子千太守

煥

憶雪樓長句云鸞城刺史城西住伐

木結樓最高處當牕便見四百峯遶屋何須三十樹江
光山色望無邊不學蘇森慣懶眠雨過披襟共長嘯月
來把酒問青天滄桑幾度荒蕪久恰喜停驂向君後疎
櫺白屋只尋常徑轉林開已非舊知君元是住山人五
馬南來不失真試倩維摩留妙筆吳綾一幅可傳神滿
前花開復花落人情翻覆秋雲薄何如萬卷攤匡牀么
鳳飛來棲綠萼百年瞬息本無多及時行樂莫蹉跎紛

紛紅土爭顏色奏爾瑤琴白雪歌載笠他時約蓬島

闕

依稀挂檐角尊中有酒綠如澗會須坐向樓頭酌又

一詞調江城子亦可誦

皇甫百泉

訪

解頤新語殊不能啟發人意非徐國昌

卿楠

談藝錄之比此書戊寅秋九月門人蘇州通判張友宓
所寄

潘烈女六安州人御史某五世孫父瀚生員幼許聘舉
人夏聲之子待年于家夫夭死其母往弔未歸女自經

以殉門人孫戶部謙文益來徵詩惜其家世年月皆未
詳聊記梗槩于此

阿含經言人壽八萬歲時毘婆尸佛出世人壽七萬歲
時尸棄佛出世云云下至賢劫第三尊迦葉佛出世人
壽亦二萬歲其次第四尊即釋迦牟尼佛當周昭王時
年三十成道住世四十九年年止七十九耳去第三尊
世尚未遠何以壽遽不滿百歲佛書支離多不可以理
詰如此而內經素問黃帝問于天師曰余聞上古之人

春秋皆度百歲而動作不衰今時之人年半百而動作皆衰何也岐伯對曰上古之人法於陰陽和於術數故能形與神俱而盡終其天年度百歲乃去今人不然故半百而衰云云夫軒轅在五帝之前而問答如此殊與末世年壽無異以此證阿含叙七佛其誕妄益較然矣乃小司馬補三皇本紀又云天皇兄弟十二人立各一萬八千歲地皇十一人亦各一萬八千歲其誕妄與阿含經又何以異

趙松雪墨梅一卷甚饒氣韻後書陳簡齋五絕句自跋
云世之論墨梅者皆以花光為稱首而簡齋五絕句誠
為絕唱余既效花光作墨梅圖復寫此詩于後大德十
一年二月十三日子昂記

十一月十三日

駕入都

高麗史朝鮮產金銀鐵水晶鹽苧布白硃紙狼尾筆果
下馬長尾雞獬海豹人參

侯官門人林佶字吉人說黃公石齋初公車時墮水隨
福州南烏龍江中逆水而上至福城北二十里白沙登
岸自言初不見水至一宮殿有王者冕旒坐堂上迎揖
命坐示以金書二大字審視之乃倪黃也是年壬戌登
第入翰林與上虞倪文正公元璐同館交最善後先後
殉國以死乃知江神之示預兆之矣先生繼配蔡氏能
詩文尤工書書法與先生亂真近始卒年八十矣

以總督管直隸巡撫兵部尚書于成龍為河道總督

河轉

董安
國罷 仍以奉天府府尹徐廷璽副之

刑部尚書張鵬翮改兵部尚書兼右都御史總督江南
江西以工部尚書李振裕為刑部尚書工部右侍郎熊
一瀟為工部尚書

以工部左侍郎提督順天學政李光地為直隸巡撫改
兵部左侍郎兼都察院副都御史起復原任工部右侍
郎李枏為工部左侍郎以內閣學士顧藻為工部右侍
郎大理寺少卿胡會恩為內閣學士兼禮部侍郎

以光祿寺卿高喬為太常寺卿

太常寺卿
王焯罷

右通政江繁

為光祿寺卿

擢巡撫陝西右副都御史巴錫為總督雲南貴州兵部
右侍郎兼副都御史改戶部右侍郎博和諾為兵部右
侍郎兼副都御史巡撫陝西

十一月二十四日

命戶部尚書陳廷敬都察院左都御史王士禎原任左
都御史王鴻緒直南書房

陳氏鳳陽府虹縣民陳文升女也初文升父宗卿以事株連繫獄有陳玉秀者仗義營救得免因以女許字玉秀子某時甫八齡值歲祲玉秀將攜其子遠適留半鏡為他日之驗泗州人周二虎者土豪也瞰玉秀年久不歸強委禽焉女知之以死自誓二虎率眾劫之女自縊以死時康熙三十二年九月二十四日女是時年十八矣父母葬之而歸妹于周十月初十日忽有羣犬開其墓女復甦過者聞棺中女子啼聲走報其家父母亟趣

至問曰汝死已半月今人耶鬼耶女曰女非鬼乃人也
急開棺攜歸二虎聞之復欲劫娶女遂投玉皇菴為尼
二虎終凌偪不已女乃浼其鄰黃子貴妻胡氏同赴京
師訴于刑部康熙三十七年戊寅十二月事也女年二十有三
福建巡撫宮夢仁疏漳浦縣士人林梅元妻魏氏現年
一百四歲循例請

旌部復建坊表曰貞壽之門

鉅鹿太學生董繼芳者居城東二十里小樹村其父中

瑋明崇禎間貸縣人吉夢川百金貧不能償易代之後
中瑋夢川皆物故夢川有孫惠迪為諸生故藏董券以
繼芳貧窶不往索也後繼芳具知其事自詣惠迪願以
父遺宅一區抵逋惠迪不受強之再三然後康熙庚
午畿南旱惠迪轉粥其宅以給朝夕值不百金繼芳又
貸金贈之曰君祖與吾先人緩急相通誼不可忘今君
食貧吾忍坐視耶敢以是補前償之不足惠迪堅不受
曰前已受宅今粥值偶不得善價耳君何與焉繼芳仍

通告鄰里共為言之惠迪乃受于是諸生袁鯤吉大用
等高兩人之義公舉于縣縣令陳汝明黜功蜀人予門
生也為文旌其義行因略之于此以風世之儼薄者云
邊鸞長安人丹青馳譽于時常轉徙澤潞間畫帶根五

參極工巧

宣和
畫譜

漢人如韓詩外傳說苑之屬有最可笑者如孔子適楚
至于阿谷之隧有處子佩瑱而浣子曰彼婦人可與言
乎抽觴以授子貢云云又抽琴去其軫云云抽締綌五

兩云云而證以南有喬木漢有遊女四句豈不近兒戲乎

康熙三十八年己卯元旦晴予同內閣大學士後先詣保和殿候

駕行禮仍趨

太和殿侍班故事惟內閣及都察院堂官得侍殿上翰林院學士侍直殿中閣臣憲臣在檻外東西相向

正月初七日以

南巡視河點扈從諸臣都察院左副都御史吳涵與焉
二月初三日

駕發京師

工部尚書熊一瀟內閣學士兼禮部侍郎徐嘉炎俱以
原官致仕以詹事府詹事顧祖榮為內閣學士兼侍郎
時顧扈從南巡少詹事徐秉義為詹事兼侍讀學士

命吏部尚書熊賜履禮部尚書張英日侍東宮進講性
理

上舟次東昌府

賜郡人原任刑部左侍郎任克溥

御書曰玉壺朗映仍

諭復原官給與

誥命異數也

西華門外廣濟寺老僧湛佑有

東宮審賜方竹杖一乃文徵明故物上有徵明篆書鳳
尾二字又八分自記一篇是八十七歲時書

張敦復

英

大宗伯言有色侍衛者滿洲人少曾駐防

東粵性嗜花卉凡南方草木異種皆致以歸老而退間
深諳栽植之法所居精舍數椽佛桑建蘭茉莉之屬環
遶其中更不凋謝又多取蝶蛋養之奩中每冬月梅花
盛開輒下簾放蝶千百為羣飛舞花間忘風雪之寒
客至則淪茗治具極歡亦一高士也

上諭截留漕米二十萬石于淮安府邳州以七萬石減
價糶于淮揚被水七州縣以一萬石減糶于邳宿等處

窮民以二萬石貯淮揚二府

上諭赦山東江南浙江經過地方見在議降罰各官及
罪人殊死以下

康熙三十七年十月二十三日

恩詔軍民七十以上許一丁侍養仍免雜汎徭役八十
以上者給絹一疋綿一斤米一石肉十斤九十以上倍
之

詔下郡邑各撫臣上其數于戶部直隸九十以上五百

三十五人奉天九十以上五人山東九十以上一千三百三十人百歲以上九人山西九十以上二百五十人河南九十以上四百五十一人江南九十以上一千六十五人百歲以上三人浙江九十以上九百八十二人陝西九十以上三百十七人湖廣九十以上二千八百五十人百歲以上四人江西九十以上五百八十人福建九十以上三百六十九人廣東九十以上五百九十一人廣西九十以上一百十四人四川九十以上一十

三人雲南九十以上四百五十人貴州九十以上九十
四人按宋開寶五年鄆陵人許永罷盧氏縣尉詣匭上
言臣年七十五父瓊年九十九長兄八十一次兄七十
九欲乞近地一官以就榮養上悅其父子兄弟俱享遐
齡賜瓊襲衣犀帶銀鞍勒馬帛三十疋茶二十斤授永
鄆城令是時澶密齊沂萊江吉等州各奏八十以上呂
繼美等二十九人並賜爵公士史冊書之以為盛事然
未有如今日之盛者也故備列之

宋思陵得李伯時畫人參地黃二藥裝演之御書東坡
二贊有鍾太常家法贊云上黨天下脊遼東真井底元
泉傾海腴白露灑天醴靈苗此孕毓肩股或具體移根
到羅浮越水灌清泚地殊風雨隔臭味終祖禰青楹綴
紫萼圓實墮紅米窮年生意足黃土手自啟上藥無炮
炙齟齬盡根柢開心定魂魄憂恚何足洗糜身副吾生
既食首重稽地黃贊不錄

炆音挂漢書哀帝時有博士炆欽與申咸上書理師丹

者又賊捕掾絮舜見張敞傳終南羣盜備宗見王尊傳
備音倍

擢貴州按察使彭鵬為巡撫廣西都察院僉都御史

撫巡

王起
元罷

駐蹕揚州府

諭加外轉原任掌印給事中李宗孔為大理寺少卿

上諭戶部蠲免江南浙江康熙三十四五五六七等年舊
欠地丁錢糧及山東泰安等十七州縣帶徵錢糧又除

兩淮加額二十萬及各省鹽差關差以軍興增額百餘萬悉除之

董卓將謀廢立謂司隸袁紹云云紹橫刀長揖曰天下健者豈惟董公班固哀帝紀贊亦云婉孌董公謂董賢也

尚某言昔在粵東與都司李某交善後李歿其妻售濠畔街宅與尚仍分院而居兩家往來如親串然一日李妻私語尚夫人有女及笄而病病且甚異欲求尚診之

而難于言夫人以告尚曰與李君夙交好言之何傷李妻乃言女初患腹痛久之洩溺甚艱洩內有物能游泳或二或三似有鱗鬣者取視之乃比目魚半體也身微黑止具一目其背白置水中果如所云試診之乃肝氣久鬱所致投以疏肝之劑而愈李河南人

金陵邱翁者平生好善遇道釋尤加敬邱一子為諸生有文名年三十矣忽覺遍體骨痛方藥無効久之身體忽漸縮小日短二三寸邱生素頰而長數月後縮至寸


餘聲如蠅蝻家人置几案上以茶椀覆之翁嫗旁皇莫知所為一日有道士形神清異坐門外數日不去亦不募化翁延入叩之初不肯言叩之再四始問君家有異事乎翁悟呼嫗出同禮拜極虔述子疾狀道士曰吾知之久矣以君積善故遠道來此予之藥三緘令翁于夜深暗中自取研水令服之三日後必有驗但勿見燈火勿近婦人手言畢飄然而去翁遵其教戒次日視其子已長數尺又踰日身長復舊矣三日後道士竟不至試

開第三緘緘內有一小人寸許躍出落地上覓之不得
邱生遂謝諸生為道裝今五十餘尚在

有任叅將者藩下世職也其第三子名中麟幼不與羣
兒嬉戲稍長好讀書間為詩作畫娶婦生二子其兄歿
中麟當襲世職力辭日兀坐小園繙道書夙奉呂真人
甚虔一日閉門作觀想欲為真人寫照于縑素移時不
能下筆隱几而臥及覺則縑上畫像已就濃睂短鬚與
俗所傳真人像迥殊自此世緣益澹告其母欲往廬山

母不許曰吾老矣汝忍絕裾往乎中麟謹受教曰天上固無不忠孝神仙遂止不行母以壽終既葬中麟盡粥其田宅攜妻子三人往遊廬山愛簡寂觀將終焉妻泣曰君即留此粵中已無棲止之所妻子將何依中麟曰吾固知之乃買茅屋八九間石田十餘畝于山中令居之而身居觀中日唯兀坐月令其長子一往省視久之出衣裝盡散道衆集山中羽衲詰別云今日亭午吾將行矣及期沐浴更衣趺坐而逝時正午皆見紫氣凌空

中麟乘白鶴揮手謝衆而去肉身今在簡寂觀東廊



居易錄卷三十